



N°223
Entrée le 23.01.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 23.01.2024

Groupe parlementaire

Här Claude Wiseler
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 23. Januar 2024

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Gesondheetsminister weiderzeleeden.

Am Moment triede geheet Fäll vu Keuchhusten (Bordetella pertussis) hei zu Lëtzebuerg op. Dëst ass eng héichustiechend Krankheet, déi virun allem bei Puppelcher liewensgeféierlech ka ginn a bei eelere Leit zu engem Kliniksopenthalt féiere kann. Et gëtt e Kombiimpfstoff, dee géint dës Bakterie, an och nach géint Diphtherie, Tetanus, Polio, Hepatitis B an Haemophilus influenzae, schützt. Well de Schutz awer net liewenslaang ass, sollen dono reegelméisseg Oprëschnge gemaach ginn (bei Erwuessenen all 10 Joer).

An dësem Kontext géing ech der Regierung gär folgend Froe stellen:

- 1) Wéi vill diagnostizéiert Fäll sinn der Santé momentan hei zu Lëtzebuerg bekannt? Wéi ass d'Verdeelung an deene verschiddenen Altersklassen (<18 Joer, 18-60, >60 Joer)?
- 2) Huet d'Santédirektioun en Aktiounsplang, wann et zu engem gréisseren Ausbroch z.B. an enger Schoul oder engem Altersheem sollt kommen? Wann net, ass d'Festleeë vu sou engem Plang am Fall vun héichustiechende Krankheeten an engem zukünftege Gesetzesprojet virgesinn?
- 3) Wéi ass momentan zu Lëtzebuerg d'Impfquot a Bezuch op dës Impfung bei Kanner a Jugendlecher?
- 4) Ginn automatesch Rappeller vun der Santé oder vun den Dokteren un d'Leit geschéckt, datt eng Oprëschnge fälleg ass?
- 5) Falls et keng automatesch Rappeller gëtt, gesäit d'Regierung am Kader vun der Digitaliséierung an Zukunft eppes an deem Sënn vir?
- 6) Si Sensibiliséierungscampagnë virgesinn, fir op déi uewe genannte Krankheeten an hir Impfungen reegelméisseg opmierksam ze maachen?

Mat déiwem Respekt,

Alexandra Schoos
Deputéiert



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 223 vum 23. Januar 2024 vun der honorabeler Deputéiert Madamm Alexandra Schoos

Wéi vill diagnostizéiert Fäll sinn der Santé momentan hei zu Lëtzebuerg bekannt? Wéi ass d'Verdeelung an deene verschiddenen Altersklassen?

Momentan sinn dem Ministère fir Gesondheet a sozial Sécherheet (tëschent Oktober 2023 an Enn Januar 2024), 46 Fäll vu Keuchhusten (och nach Coqueluche oder bloen Houscht genannt) bekannt.

De folgenden Tableau weist d'Verdeelung op déi verschidden Altersklassen vun Oktober 2023 bis Enn Januar 2024 am Detail:

Alterskategorie*	Unzuel u Fäll
0-4 Joer	5
5-9 Joer	3
10-19 Joer	24
20-44 Joer	6
45-54 Joer	4
55 Joer a méi	4

* Verschidden Alterskategorien an denen et just ganz wéineg Fäll gouf, si regroupéiert ginn

Huet d'Santésdirektioun en Aktiounsplang, wann et zu engem gréisseren Ausbroch z.B. an enger Schoul oder engem Altersheem sollt kommen? Wann net, ass d'Festleeë vu sou engem Plang am Fall vun héichustiechende Krankheeten an engem zukünftege Gesetzesprojet virgesinn?

D'Inspection Sanitaire ass, laut ofgeännertem Gesetz vun der Gesondheitsdirektioun aus dem Joer 1980, fir d'Gestioun vun Epidemien zoustänneg. Konkret heescht dat, dass iwwert ee sougenannte Contact Tracing, a bestëmmte Situatioune, Kontaktpersone prophylaktesch Antibiotiquen, respektiv eng Impfung ugebuede kréien, jee no Alter, Impfstatus oder Vulnerabilitéit.



Wéi ass momentan zu Lëtzebuerg d'Impfquot a Bezuch op dës Impfung bei Kanner a Jugendlecher?

Alter vum Kand	Impfung	Unzuel vun Impfdosen	Impfquoten 2018	Impfquoten 2023
13Méint	Pertussis	3	99%	99%*
25-30 Méint	Pertussis	4	90%	93%*

* Donnéeë fir d'Joer 2023 si provisoiresch a ginn aktuell validéiert

D'Donnéeën iwwer d'Impfquote vu Kanner géint de bloen Houscht kommen aus der Ëmfro zur Impfungsofdeckung vun de Kanner vu 25 bis 30 Méint. Dës Ëmfro fënnt all 5 bis 6 Joer statt. D'Miessung vun der Impfquot bei Kanner vu 25 bis 30 Méint ass am Zesammenhang mam nationalen Impfprogramm, dee vum CSMI recommandéiert ass, an an deem Impfung bis 24 Méint virgesi ginn.

- Am Joer 2018 louch d'Impfquot bei Kanner vu 25-30 Méint géint de bloen Houscht am Alter vun 13 Méint bei 99% (3 Dose vum komplette 4-Dosen Impfschema). Lëtzebuerg läit wäit iwwer dem vun der WHO recommandéierten Impftaux, deen 90% entsprécht, an dëser Alterskategorie.

Am Joer 2023 gouf eng nei Ëmfro gemaach. Déi provisoiresch Resultater weisen op eng Impfquot vun 99% am selwechten Alter.

- D'Ofdeckung fält liicht erof ëm den Alter vu 25-30 Méint (komplette 4-Dosen Impfschema) fir 90% am Joer 2018 z'erreechen. D'provisoiresch Donnéeë fir 2023 bréngen dësen Taux op 93%. Dës Zuele falen an d' Herdenimmunitéitsfenster fir de bloen Houscht, déi tëscht 90% an 94% läit.

Ginn automatesch Rappeller vun der Santé oder vun den Dokteren un d'Leit geschéckt, datt eng Opfrëschung fälleg ass? Falls et kenq Rappeller gëtt, gesäit d'Reqierung am Kader vun der Digitaliséierung an Zukunft eppes an deem Sënn vir?

Am Kader vun der schoulmedezinescher Ënnersichung, déi all 2 Joer stattfënnt, gëtt d'Impfkaart kontrolléiert. Falls e Rappel néideg ass, ginn déi legal Virgesetzt duerch e Bréif informéiert, a kënnen esou d'Opfrëschung vun der Impfung vun hirem Dokter maache loossen.



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Si Sensibilisierungscampagnë virgesinn, fir op déi uewe genannte Krankheeten an hir Impfunge reegelméisseg opmierksam ze maachen?

All Joer ass Enn Abrëll déi europäesch Woch vun der Vaccinatioun, eng Initiativ vun der OMS¹, déi och zu Lëtzebuerg stattfënnt. An dem Kader ginn d'Leit sensibiliséiert op d'Impfungen an hir Wichtigkeet fir d'Verbreede vu verschidden Infektiounen ze vermeiden. Reegelméisseg ginn och punktuell Campagnen erstallt mat engem Fokus op gezielte Krankheeten an hir respektiv Impfungen^{2 3}.

Lëtzebuerg, den 20. Februar 2024

D'Ministesch fir Gesondheet
a sozial Sécherheet,

(s.) Martine DEPREZ

¹ <https://www.who.int/europe/fr/campaigns/european-immunization-week>

² Campagne „Luttez contre les infections respiratoires“ am Hierscht 2023

³ <https://sante.public.lu/fr/campagnes/2023/infections-respiratoires-covid-grippe-pneumo-bronchiolite.html>